



24. aggusti 2018

UKA2018/108

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Inissianik attartortitsisarneq pillugu Inatsisartut peqqussutaani nr. 2-mi, 12. maj 2005-imeersumi ilanngussaq 4 (Ileqqorissaarnissamut malittarisassat) allanngorteqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasillunga tungaviusumik pisortat inissiaataanni qimmeqarnissaq aamma/imaluunniit qitsuuteqarnissaq akuerineqarsinnaalersillugu.**  
(Inatsisartunut ilaasortaq Randi Vestergaard Evaldsen, Demokraatit)

### **Tungavilersuut**

Qimmeqarneq qitsuuteqarnerluunniit inuup nammineq piumassutsiminik qinertarpa. Toqqaaneruvorli akisussaaffimmik, utaqqisinnaanermik, asanninnermik, eqqiaasinnaanermik allarpassuarnillu nassatalik. Isumaqartoqallariaanani suliassaq imaaliillaannarneqarsinnaasoq. Akisussaaffeqartuartariaqarpoq. Uumasuutip pisariaqartippaa isumassorneqarnissaq, angallanneqartarnissaq, susassaqartinneqarnissaq, uumasut nakorsaannukaanneqartarnissaq, nerisaqarnissaq imigassaqarnissarlu. Paarlattuanik ilinniarneqartarpoq imminuinnaq pinnani aammali allanut akisussaassuseqarnissaq aamma asaneqarnerujussuaq misigisassaasarpoq.

Ajoraluartumilli malittarisassat ullutsinni imaapput kikkut tamarmik periarfissaqaratik qimmeqarnissaminnut qitsuuteqarnissaminnulluunniit. Isumaga naapertorlugu tamanna kukkuneruvoq mikinngitsoq.

Inissianik attartortitsisarneq pillugu Inatsisartut peqqussutaata bilag 4-ani uumasuuteqarneq pillugu imaattoq atuarneqarsinnaavoq:

"Attartortitsisoq allakkatigut akuersiteqqaarnagu qimmeqartoqaqqusaananilu qitsuuteqartoqaqqusaanngilaq. Allamik peqqutissaqavitsinnagu ilaqutariinnut arlalinnut inissiani, tassalu illuni uiguleriinni inissiarsuarnilu qimmiuteqartoqaqqusaananilu qitsuuteqartoqaqqusaanngilaq. Qimmeqarnissamut qitsuuteqarnissamulluunniit immikkut ittumik qularnaveeqqusiisoqarnissaa attartortitsisup piumasarisinnaavaa"<sup>1</sup>

Malittarisassat ullumikkut atuuttut naapertorlugit pisortat inissiaataanni soorlu qimmeqarnissaq qitsuuteqarnissarluunniit inerteqquataavoq. Inuppasuit uumasunut pineqartunut asannittuupput

---

<sup>1</sup> [http://lovgivning.gj/-/media/lovfiler/2005/ltf\\_nr\\_02-2005\\_bilag4\\_dk.ashx](http://lovgivning.gj/-/media/lovfiler/2005/ltf_nr_02-2005_bilag4_dk.ashx)



aamma isumaqarpunga kukkunerusoq, tunngaviusumik inuit taakku qimmeqarnissaannut qitsuuteqarnissaannulluunniit mattuteqqagatsigit.

Paasisinnaavara ilaanni inerteqquteqarnissaq pisariaqartarmat taamaakkaluartorli isumaqarpunga mumittariaqaripput tunngaviusumik qimmeqarnissamat qitsuuteqarnissamullu akuerineqartarnissaq allakkatigit akuersissummik peqqaanngikkaluarluni.

Paatsoortoqaqqunagu naqissuseriissavara siunnersuummi matuma taamaallaat pineqarmat pisortat inissiaataanni uumasuuteqarsinnaanissaq. Nammineq illuutiminnik attartortitsisartut nammineq soorunami aalajangersinnaasariaqassavaat attartortutik uumasuuteqarsinnaassanersut. Nammineq piginnittutut pisinnaatitaaffiit ataqqineqartuassapput.

Qilanaarpugut partiit allat oqaaseqaatissaannut taamatullu Naalakkersuisut akissutaasa tusarnissaannut.

**Aningaasarsiornikkut allaffissornikkullu pisortanut kingunissai.**

Ilanngussap 4-p allanngortinneranut atatillugu allaffissorneq mikisuaraassoq aamma inuup ataatsip qaammatini pingasuni sulinissaa sinnernavianngilaa.

**Aningaasarsiornikkut allaffissornikkullu namminersorlutik inuutissarsiutunut kingunissai.**  
Soqanngilaq.

**Aningaasatigit allaffissornikkullu innuttaasunut kingunissai.**

Siunnersuut iluaqutaassaaq pisortat inissiaataanni attartortunut, qimmitaarusunngikkunik qitsuutitaarusuttunut. Siunnersuut innuttaasut pisinnaatitaaffiitut atuutereersunut naleqqiullugu aningaasatigit kinguneqarnavianngilaa. Innuttaasut init attartukkat qimatatik suli iluarsaattartussavaat, uumasuutigisaaq inimi aseruisimappat.